

BWRDD RHIANTA CORFFORAETHOL CYNGOR RHONDDA CYNON TAF

Cofnodion cyfarfod y Bwrdd Rhianta Corfforaethol a gynhaliwyd ar-lein ddydd Llun, 31 Ionawr 2022
am 10.00am

Cynghorwyr y Fwrdeistref Sirol – Aelodau o'r Bwrdd Rhianta Corfforaethol a oedd yn bresennol:-

Y Cynghorydd C. Leyshon (Cadeirydd)
Y Cynghorydd G. Caple (Is-gadeirydd)
Y Cynghorydd S. Rees-Owen
Y Cynghorydd E. Griffiths
Y Cynghorydd J. Bonetto
Y Cynghorydd S. Rees

Dyma'r Swyddogion oedd yn bresennol

Ms A Lloyd, Cyfarwyddwr Gwasanaeth, Gwasanaethau i Blant
Ms S. Edwards, Rheolwr Gwasanaeth
Mr A Cope, Rheolwr Datblygu Rhanbarthol – Gwasanaethau Maethu
Ms M Davies, Tros Gynnal Plant Cymru
Ms J Thomas, Rheolwr Cwynion a Sicrhau Ansawdd – Gwasanaethau Cymdeithasol
Ms C Jones, Pennaeth Materion Mynediad a Chynhwysiant
Ms C Miles, Cyfreithiwr Gofal Plant

Eraill oedd yn bresennol

Annabel Galt, VfCC/Fforwm Glasbrint – Swyddog Datblygu
Tracy Greuter – Arloeswr Gofal Maeth
A W - Cynrychiolydd Pobl Ifainc

43 DATGAN BUDDIANT

Cafodd buddiant ei ddatgan gan Gynghorydd y Fwrdeistref Sirol S. Rees mewn perthynas ag eitem 3 yr agenda gan ei bod yn gynrychiolydd RhCT fel Aelod o'r Panel Mabwysiadu.

44 CROESO

Manteisiodd y Cadeirydd ar y cyfle i groesawu Cynghorydd y Fwrdeistref Sirol G Caple i'r Pwyllgor, a Swyddogion o Voices from Care Cymru i'r cyfarfod gyda chroeso arbennig i'r cynrychiolydd pobl ifainc.

45 YMDDIHEURIADAU

Cafodd ymddiheuriadau am absenoldeb eu derbyn oddi wrth Gynghorydd y Fwrdeistref Sirol L Hooper a Mr P Mee, Cyfarwyddwr Cyfadran y Gwasanaethau Cymuned a Gwasanaethau i Blant.

PENDERFYNWYD cadarnhau cofnodion cyfarfod Pwyllgor y Bwrdd Rhianta Corfforaethol a gynhaliwyd ar 29 Tachwedd 2021.

VOICES FROM CARE CYMRU (VFCC) – DIWEDDARIAD GAN Y CYNRYCHIOLYDD POBL IFAINC

Cyflwynodd y Swyddog Datblygu y cynrychiolydd pobl ifainc (AW) i'r Pwyllgor; rhoddodd AW y diweddaraf i Aelodau'r Pwyllgor am ei gweithgareddau diweddar yn ystod y 3 mis diwethaf. Tynnodd sylw at ennill gwobr, sef Cyflawnwr Ifanc y Flwyddyn, trwy raglen Gofal i Waith. Pwysleisiodd arwyddocâd Gofal i Waith a charfan Gwasanaethau Cymdeithasol RhCT a roddodd gymorth iddi i geisio llety parhaol a rheoli biliau. Rhoddodd AW wybod i Aelodau am y cymorth parhaus a roddwyd gan Voices from Care Cymru i bobl ifainc drwy gydol y pandemig, er enghraifft trefnu achlysuron ar Zoom, galwadau ffôn a galwadau fideo i gadw mewn cysylltiad.

Manteisiodd y Cadeirydd ar y cyfle i longyfarch AW ar ei gwobr ac roedd yn falch o weld yr holl gynnydd y mae wedi'i wneud yn ei bywyd personol.

Rhoddodd y Swyddog Datblygu wybod i Aelodau am achlysuron diweddar a gafodd eu canslo o ganlyniad i'r pandemig. Serch hynny, roedd modd i sefydliad VfCC addasu ei wasanaethau trwy gynnal gweithgareddau yn yr awyr agored, achlysuron ar-lein a chymorth un i un. Wrth i gyfyngiadau gael eu llacio, rhoddodd y Swyddog Datblygu o VfCC wybod i Aelodau am brosiectau sydd i'w cynnal yn y dyfodol i ddenu grwpiau ehangach o bobl ifainc yn RhCT. Nododd y Swyddog waith ar y cyd â Chyfarwyddwr Gwasanaethau i Blant i sefydlu gweithdy ar gyfer y Siarter Arfer Gorau i rieni sydd wedi derbyn gofal.

Roedd y Cadeirydd yn hapus gyda'r diweddariad ar lafar ac aeth ati i gydnabod yr angen i ailddechrau cynnal gwasanaethau wyneb yn wyneb i ymgysylltu â phobl ifainc yn RhCT.

Yn dilyn y diweddariad ar lafar, **PENDERFYNWYD**:

- Nodi'r diweddariad a gafodd ei roi i'r Bwrdd

47 ADRODDIAD BLYNYDDOL MABWYSIADU RHANBARTHOL Y FRO, Y CYMOEDD, A CHAERDYDD 2020/21

Rhoddodd Cyfarwyddwr y Gwasanaethau i Blant drosolwg cryno o Adroddiad Blynyddol Mabwysiadu Rhanbarthol y Fro, y Cymoedd, a Chaerdydd. Rhoddwyd gwybod i Aelodau'r Pwyllgor fod y Pwyllgor Craffu eisoes wedi trafod yr adroddiad ym mis Rhagfyr 2021; cafwyd sylwadau calonogol am yr adroddiad.

Nododd Cyfarwyddwr y Gwasanaethau i Blant mai dyma'r 6^{ed} Adroddiad Blynyddol y Cydwasanaeth Mabwysiadu Rhanbarthol a gafodd ei sefydlu yn seiliedig ar Ddeddf Gwasanaethau Cymdeithasol a Llesiant 2014. Yn yr adroddiad mae manylion am adrodd ar gyflawniad mewn perthynas â materion megis recriwtio mabwysiadwyr, gwneud penderfyniadau er mwyn i blant gael eu mabwysiadu, chwilio am deuluoedd a chymorth ar ôl mabwysiadu.

Cafodd Aelodau wybod am y gostyngiad bach yn y galw yn ystod cyfnod cyntaf y pandemig. Serch hynny, mae'r galw wedi dechrau cynyddu.

Yn yr adroddiad tynnwyd sylw at y 26 gorchymyn lleoliad. Serch hynny, pan ymchwiliwyd i gyflawniad y Gwasanaethau i Blant ddiwethaf, roedd 33 gorchymyn mabwysiadu wedi cael eu gwneud yn ystod 2020/21. Yn ystod cyfnod adrodd 2020/21, cadarnhaodd y Cyfarwyddwr Gwasanaethau i Blant y bydd 22 o blant yn cael eu mabwysiadu erbyn 31 Mawrth 2021. Rhoddwyd gwybod i Aelodau i nodi effeithiolrwydd yr ymgyrch recriwtio a

chynnydd yn nifer y mabwysiadwyr sydd wedi creu effaith gadarnhaol o ran nifer is o fabwysiadau nad ydyn nhw'n gysylltiedig ag asiantaeth. Rhoddodd y Cyfarwyddwr Gwasanaethau i Blant wybod i Aelodau am y cynnydd yn nifer y ceisiadau am gymorth ar ôl mabwysiadu a nododd arwyddocâd rhoi cymorth i fabwysiadwyr. Nododd y Cyfarwyddwr Gwasanaethau i Blant yr angen am adnoddau ychwanegol i fabwysiadwyr gan fod y galw wedi cynyddu.

Roedd y Cadeirydd yn hapus gyda'r wybodaeth a ddarparwyd a gofynnodd i Aelodau am unrhyw gwestiynau.

Roedd un Aelod yn hapus gyda'r cyllid a ddarparwyd i gyflogi gweithiwr cymdeithasol rhan amser i gefnogi rhieni geni. Serch hynny, gofynnodd yr Aelod am y mecanweithiau atgyfeirio a'r math o gymorth y mae modd ei ddefnyddio i gefnogi rhieni geni.

Yn rhan o ddatblygiad gwasanaethau ychwanegol, rhoddodd y Cyfarwyddwr Gwasanaethau i Blant wybod i Aelodau am gyflwyno gwasanaeth 'Llwybr Cyn Geni'. Y bwriad yw gwella'r cymorth sydd ar gael i atal plant a rhieni rhag cael eu gwahanu. Nododd y Cyfarwyddwr Gwasanaethau i Blant wasanaeth datblygu arbrofol newydd, sef Eiriolaeth Rhieni. Bydd hyn yn cynnwys cymorth i rieni i fynychu cyfarfodydd megis Cynadleddau Amddiffyn Plant. Nodwyd canlyniadau gwych gan Awdurdodau Lleol eraill sy'n rhoi'r gwasanaeth yma ar brawf gan fod rhieni wedi teimlo eu bod nhw'n cymryd rhan fwy yn y gwasanaethau cymorth a ddarperir.

O ran y mecanwaith atgyfeirio, nododd y Cyfarwyddwr Gwasanaethau i Blant bwysigrwydd cwnsela i'r rhieni geni yn rhan o'r broses fabwysiadu. Felly, cyn i unigolyn sy'n gwneud penderfyniadau o'r asiantaeth ystyried mabwysiadu plentyn, mae'n sicrhau bod atgyfeiriadau wedi'u gwneud at wasanaeth cwnsela i rieni.

Croesawodd un Aelod roi eiriolaeth rhieni ar waith, gan gydnabod ei bod yn hanfodol o ran rhoi cyfle i rieni gymryd rhan a mynegi eu hunain. Gofynnodd yr Aelod am ragor o wybodaeth am ddyfodol y gwasanaethau ar fuddsoddiadau yn dilyn cynnydd yn y galw y flwyddyn ganlynol.

Cytunodd y Cyfarwyddwr Gwasanaethau i Blant â'r Aelod gan nodi'r angen am fuddsoddiad a chyllid pellach i symud gwasanaethau ychwanegol yn eu blaenau er mwyn diwallu'r galw. Rhoddodd y Cyfarwyddwr Gwasanaethau i Blant wybod i'r Pwyllgor am ddyddiad sydd wedi'i drefnu ar gyfer y mis canlynol i ymchwilio i sut mae modd i rieni sy'n mabwysiadu gael y cymorth cywir ar yr adeg gywir a sicrhau bod modd i rieni sy'n mabwysiadu fanteisio ar yr holl wasanaethau cymorth cynnar sydd ar gael iddyn nhw. Cadarnhaodd y Cyfarwyddwr Gwasanaethau i Blant lansiad y gwasanaeth cymorth amlasiantaeth sy'n wasanaeth therapiwtig i blant sydd wedi'u mabwysiadu a phlant sy'n derbyn gofal. Byddai gwybodaeth bellach yn cael ei rhoi i'r Bwrdd Rhianta Corfforaethol mewn cyfarfodydd yn y dyfodol i dynnu sylw at y cynlluniau gweithredu a'r cynnydd sydd wedi'i wneud gan y gwasanaeth.

Yn dilyn trafodaeth, **PENDERFYNWYD:**

- Nodi cynnwys yr adroddiad

48 ADRODDIAD BLYNYDDOL ANSAWDD GOFAL Y GWASANAETH MAETHU

Cyflwynodd Rheolwr y Gwasanaeth ei hun i'r Pwyllgor fel y person enwebedig at ddibenion AGC o ran maethu yn RhCT. Rhoddodd wybod i Aelodau'r Pwyllgor mai nod yr adroddiad yw rhoi trosolwg o ansawdd blynyddol gofal o ran y gwasanaeth maethu yn 2020/21. Cadarnhaodd Rheolwr y Gwasanaeth mai canolbwyt y gwasanaeth yn ystod 2020/21

oedd sicrhau bod rhieni maeth yn cael y cymorth gorau posibl. O ganlyniad i ddefnyddio technoleg, cadarnhaodd Rheolwr y Gwasanaeth fod modd cynnal cysylltiad cyson â rhieni maeth, er enghraifft dros y ffôn neu drwy alwadau fideo. Hefyd, cafodd y gwasanaeth ei addasu er mwyn cynnal cyfarfodydd ar-lein, megis y Panel Maethu.

Yn ogystal â chymorth cyson parhaus i rieni maeth, rhoddodd Rheolwr y Gwasanaeth wybod i Aelodau am wasanaeth newydd a gafodd ei gyflwyno sy'n cynnwys ymgynghori â chynhalwyr sy'n berthynas a chynhalwyr prif ffrwd. Pwrpas yr ymgynghoriadau oedd nodi gwelliannau y byddai modd eu gwneud o ran mynychu cyfarfodydd y panel, prosesau'r panel, arfarniadau ar gyfer Aelodau'r panel, ac aildrefnu dyddiadau cyfarfodydd y panel i annog gweithwyr cymdeithasol i fynychu. Aeth Rheolwr y Gwasanaeth ati i gydnabod yr angen i weithio'n agos gyda rhieni ac o ganlyniad i ymgynghori â rhieni ar blant sy'n derbyn gofal maeth, mae hyn wedi cael ei roi ar waith. Mae'r garfan wrthi'n gweithio gyda gwasanaeth y Swyddogion Adolygu Annibynnol i lunio adroddiadau i rieni er mwyn rhoi cyfle iddyn nhw fynegi eu barn ar y gofal maeth a dderbyniwyd.

Yn ystod y cyfnod clo cyntaf, cadarnhaodd Rheolwr y Gwasanaeth waith ar y cyd â Rhwydwaith Maethu yn rhan o raglen les. Rhoddwyd gwybod i Aelodau am lwyddiant y rhaglen les o ran cyflwyno Arloeswyr. Nodwyd arwyddocâd Arloeswyr o ran cefnogi rhieni maeth newydd yn RhCT. Cafwyd gwybod am yr heriau y mae'r gwasanaeth yn eu hwynebu megis recriwtio rhieni maeth ychwanegol sy'n barod i weithio gyda phobl ifainc sydd ag anghenion cymhleth, a phobl ifainc yn eu harddegau hŷn.

Cyflwynodd Rheolwr y Gwasanaeth Ms Greuter i'r Pwyllgor a roddodd drosolwg o rôl a phrofiadau Arloeswr yn RhCT. Nododd yr Arloeswr fanylion y gweithgareddau amrywiol sy'n cael eu cynnal yn rhan o'r rôl. Roedd y rhain yn cynnwys gweithio ar y cyd â Maethu Cymru mewn perthynas â lansiad 22 Drws Maethu, mynd i Baneli Cyflogaeth a thrafod effeithiolrwydd polisïau. Rhoddodd yr Arloeswr wybod am arwyddocâd y rôl o ran creu systemau cymorth i rieni maeth ac amgylchedd lle mae cyfathrebu agored yn cael ei annog er mwyn trafod yr heriau a datrysiadau. Siaradodd yr Arloeswr am ddatblygiad y rôl, gyda chymorth yn cael ei roi i rieni maeth ar-lein o ganlyniad i'r pandemig. Serch hynny, roedd yr Arloeswr yn gobeithio ailddechrau cynnal y gwasanaeth wyneb yn wyneb wrth i'r cyfyngiadau gael eu llacio.

Roedd y Cadeirydd yn hapus gyda'r gwaith a'r cymorth a ddarperir i rieni maeth gan Arloeswyr. Aeth y Cadeirydd ati i gydnabod pwysigrwydd cyfathrebu rhwng rhieni maeth ac Arloeswyr er mwyn rhannu profiadau, cyngor a datrysiadau.

PENDERFYNODD y Bwrdd Rhianta Corfforaethol:

- Cydnabod yr wybodaeth yn yr adroddiad.

49 'DRWS BLAEN' MAETHU CWM TAF

Rhoddodd Rheolwr Datblygu Rhanbarthol Gwasanaethau Maethu y diweddaraf am y ddau ddatblygiad sylweddol sydd wedi'u gwneud ers adrodd i'r Bwrdd yn ystod y flwyddyn flaenorol. Cadarnhawyd bod Cyngor Bwrdeistref Sirol Pen-y-bont ar Ogwr wedi ymuno â'r Drws Blaen Rhanbarthol er mwyn ehangu'n ymhellach ar y gwaith ar y cyd a rhannu adnoddau ac arfer da. Ar hyn o bryd, cadarnhaodd y Rheolwr Datblygu Rhanbarthol ymrwymiad y tri Awdurdod Lleol mewn perthynas â recriwtio rhieni maeth. Rhoddwyd gwybod i Aelodau am y datblygiad sylweddol arall o ran lansiad Maethu Cymru, sef cydweithrediad cenedlaethol o bob un o'r 22 o Awdurdodau Lleol. Roedd y Rheolwr Datblygu Rhanbarthol yn hapus gyda'r buddsoddiadau wedi'u darparu gan Lywodraeth Cymru.

Cafodd Aelodau wybod am y newidiadau a gafodd eu rhoi ar waith i wasanaethau megis brandio a gwefan newydd ar draws pob Awdurdod Lleol. Nodwyd arwyddocâd y gwefannau newydd ar draws pob Cyngor i hyrwyddo'r neges am Faethu Lleol ac i gynnal y datganiad cenhadaeth, sef 'Mae plant lleol wrth galon popeth rydyn ni'n ei wneud'.

Er gwaethaf llwyddiant y gwasanaeth, aeth Rheolwr Datblygu Rhanbarthol Gwasanaethau Maethu ati i gydnabod yr heriau o ran recriwtio rhieni maeth ledled y DU. Cafwyd gwybod am y gostyngiad o 50% yn nifer yr ymholiadau ac ymweliadau cychwynol am rolau rhieni maeth. O ganlyniad i hyn, mae gwaith ymchwilio wedi cael ei gynnal i ddod o hyd i esboniad. Nodwyd mai'r rheswm dros y gostyngiad oedd arfer ar ôl y pandemig ac, ar lefel leol, pobl nad oedden nhw'n effro i'r brandio newydd. Er gwaethaf y gostyngiad yn nifer yr ymholiadau ac ymweliadau cychwynol, roedd Rheolwr y Gwasanaeth Rhanbarthol – Gwasanaethau Maethu yn falch o weld cynnydd yn nifer y bobl sy'n mynd ymlaen at fuddsoddiad a chymeradwyaeth. Yn ystod y tair blynedd diwethaf, nodwyd bod cynnydd i'w weld yn nifer y rhieni maeth bob blwyddyn. Rhoddodd Rheolwr Datblygu Rhanbarthol Gwasanaethau Maethu wybod i Aelodau am welliannau y mae angen eu gwneud o ran darpariaeth cadw rhieni maeth a sicrhau bod Awdurdodau Lleol yn cadw at yr Ymrwymiad Cenedlaethol.

O ran y dyfodol, bydd cynlluniau'n cael eu rhoi ar waith i hyrwyddo Maethu Cymru er mwyn denu'r genhedlaeth iau i ddod yn rhieni maeth. Mae ymgyrchoedd llwyddiannus wedi cael eu lansio, er enghraifft ar y radio, y teledu, Spotify ac ar y cyfryngau cymdeithasol er mwyn hyrwyddo Maethu Cymru. Ar lefel leol, siaradodd Rheolwr Datblygu Rhanbarthol Gwasanaethau Maethu am lansio ymgyrch sy'n hysbysebu Maethu Cymru ar fysiau ac ar y radio (Capital FM) ledled Cwm Taf.

Rhoddodd y Cadeirydd ddiolch i Reolwr Datblygu Rhanbarthol Gwasanaethau Maethu am ei adroddiad a'r gwaith sydd wedi'i gynnal yn rhan o'r Bwrdd Rhianta Corfforaethol dros y tair blynedd. Dymunodd y Cadeirydd bob lwc iddo yn ei rôl newydd yng Nghyngor Caerdydd.

50 ADRODDIAD CHWARTEROL TROS GYNNAL

Cafodd y Bwrdd ddiweddariad gan Ms Davies am y cynnydd sydd wedi'i wneud gan elusen Tros Gynnal Plant Cymru. Dechreuodd Ms Davies gan ganolbwyntio ar adran Cynnig Rhagweithiol yr adroddiad. Yn seiliedig ar y Cynnig Rhagweithiol yn Chwarter 3, manteisiodd 32 o bobl ifainc ar y gwasanaeth sy'n seiliedig ar faterion, a chafodd 12 o bobl ifainc eu hatgyfeirio at y Cynnig Rhagweithiol. Roedd dros hanner y bobl ifainc a fanteisiodd ar y gwasanaeth sy'n seiliedig ar faterion yn gwneud hynny am y tro cyntaf. Cafodd Aelodau wybod am y gostyngiadau mewn perthynas ag Eiriolaeth yn seiliedig ar Faterion (IBA) a'r Cynnig Rhagweithiol yn Chwarter 3 o'u cymharu â'r Chwarteri blaenorol (2). Yn ystod Chwarter 3, roedd 86 o bobl ifainc yn gymwys am y Cynnig Rhagweithiol ac allan o'r 86 yma, roedd 18 yn blant sy'n derbyn gofal. Cafodd yr Aelodau wybod am 2 berson ifanc a gafodd eu cynnwys ddwywaith gan eu bod nhw'n bodloni'r meini prawf o ran Amddiffyn Plant (CP) a Phlant sy'n Derbyn Gofal, felly nifer y bobl ifainc oedd 84.

Yn seiliedig ar yr wybodaeth a ddarparwyd gan Awdurdodau Lleol, gwrthododd 50 o blant a phobl ifainc gyfarfod y Cynnig Rhagweithiol pan gafodd ei awgrymu gan eu gweithwyr cymdeithasol. Serch hynny, derbyniodd 11 a chawson nhw eu hatgyfeirio. Gwrthododd 20 o bobl ifainc y Cynnig Rhagweithiol heb reswm a gwrthododd 30 o bobl ifainc y cynnig i gwrdd ag eiriolwr. Nododd 12 person ifanc fod gwell gyda nhw siarad ag aelod o'r teulu.

Tynnodd Ms Davies sylw'r Aelodau at y graffau yn yr adroddiad a roddodd grynodedb o feini prawf Atgyfeiriadau'r Cynnig Rhagweithiol, Eiriolaeth yn seiliedig ar Faterion a demograffeg

defnyddwyr y gwasanaeth yn ystod Chwarter 3.

PENDERFYNWYD:

- Nodi cynnwys yr adroddiad
- Derbyn diweddariadau ar gynnydd TGP yn y dyfodol

51 Eithrio'r Wasg a'r Cyhoedd

PENDERFYNWYD bod y cyfarfod hwn yn cadw aelodau o'r wasg ac aelodau o'r cyhoedd allan o ystafell y cyfarfod, dan Adran 100A(4) o'r Ddeddf Llywodraeth Leol (fel y'i diwygiwyd), yn ystod trafod yr agendwm nesaf, ar y sail y byddai'n debygol o olygu datgelu gwybodaeth eithriedig yn ôl diffiniad paragraff 14 o Ran 4 o Atodlen 12A o'r Ddeddf.

52 Gwasanaethau Cymdeithasol - Cwynion a Chanmoliaethau Chwarterol

Rhoddodd yr adroddiad yma drosolwg i'r Bwrdd Rhianta Corfforaethol o'r trefnau gweithredu ac effeithiolrwydd gweithdrefn cwynion y Gwasanaethau Cymdeithasol statudol rhwng **1 Hydref 2021 a 31 Rhagfyr 2021**.

Roedd yr adroddiad yn cynnwys gwybodaeth am nifer y cwynion a ddaeth i law, natur y cwynion, ac unrhyw wersi a ddysgwyd, yn ogystal â manylu ar ymholiadau gan Gynghorwyr, Aelodau o'r Senedd ac Aelodau Seneddol a nifer y cwynion a ddaeth i law.

Yn dilyn trafodaethau mewn perthynas â'r eitem eithriedig, **PENDERFYNWYD:**

- Nodi cynnwys yr adroddiad a'r gwaith sydd wedi ei gyflawni gan yr Uned Gwynion.

53 DERBYN DIWEDDARIAD GAN Y CYFARWYDDWR GWASANAETHAU I BLANT.

Rhoddodd y Cyfarwyddwr Gwasanaethau i Blant ddiweddariad ar lafar ar y tri phrif weithgaredd sydd wedi digwydd hyd yn hyn. Cafodd Aelodau wybod am gymeradwyaeth y Cabinet o'r strategaeth atal ar gyfer Plant sy'n Derbyn Gofal.

Yn ail, canmolodd y Cyfarwyddwr Gwasanaethau i Blant y gwaith a gafodd ei gynnal gan Ms Ceri Jones – Pennaeth Materion Mynediad a Chynhwysiant a Ceri Webster – Dirprwy Flaen Swyddog – Seicolegydd Addysg o ran arwain proses penodi Pennaeth Plant sy'n Derbyn Gofal. Rhoddodd y Cyfarwyddwr Gwasanaethau i Blant wybod i Aelodau am arwyddocâd y Pennaeth o ran trawsnewid Addysg i Blant sy'n Derbyn Gofal. Yn olaf, siaradodd y Cyfarwyddwr Gwasanaethau i Blant am brosiect ymchwil diweddar a gafodd ei gynnal gan CASCADE a nododd angen sylweddol am gymorth ystyrllon ar gyfer pobl ifainc sy'n dod yn rhieni. Rhoddodd y Cyfarwyddwr Gwasanaethau i Blant wybod i Aelodau am weithdy sydd i'w gynnal ar ôl yr etholiad. Bydd y Bwrdd yn cael gwahoddiad i'r gweithdy lle y bydd darganfyddiadau'r ymchwil yn cael eu cyflwyno.

Roedd y Cadeirydd yn hapus iawn gyda'r diweddariad ac edrychodd ymlaen at

fynd i'r gweithdy i ddysgu rhagor am yr ymchwil.

PENDERFYNODD y Bwrdd Rhianta Corfforaethol:

- Derbyn adroddiad ar y Strategaeth Plant sy'n Derbyn Gofal.

**Daeth y cyfarfod i
ben am 11.11am**

**Y Cynghorydd C Leyshon
Cadeirydd.**